

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

- नेशनल कांफ्रेंस दे लीडर उमर अब्दुल्ला होर अज्ज जम्मू-कश्मीर दे मुखमंत्री दे औहदे दी सगंध चुक्कडन।
- विदेश मंत्री डॉ. एस जयशंकर होर अज्ज पाकिस्तान च शंघाई सहयोग संगठन दी बैठका च हिस्सा लैडन।
- गृह मंत्री अमित शाह होरें पुलस अधिकारिणं गी आखेआ ऐ जे ओह देशवासिणं दे बुनियादी अधिकारें दी हिफाजत लेई पूरी चाल्ली सौहगे ते सतर्क रौहन।
- क्रिकेट च भारत ते न्यूजीलैंड बश्कार टेस्ट क्रिकेट श्रृंखला दा पैहला मैच अज्जै थमां बेंगलोर च ते आई.सी.सी महिला टी-20 विश्व कप च वेस्ट इंडीज दी टीम सैमीफाइनल च पुज्जी गेई ऐ।

<><><><><><>

### J&K Swearing

नेशनल कांफ्रेंस दे नेता उमर अब्दुल्ला होर अज्ज केंद्र शासित प्रदेश जम्मू-कश्मीर दे मुखमंत्री दे औहदे दी सगंध चुक्कडन। उपराज्यपाल मनोज सिन्हा होर उनेंगी औहदे ते राजदारी दी सगंध दोआंगन।

शपथ ग्रहण समारोह बड्डलै साइडे 11 बजे श्रीनगर दे शेर-ए-कश्मीर अंतरराष्ट्रीय कन्वेंशन सेंटर च लग्गोग जेदे च उमर अब्दुल्ला हुंदे अलावा उंदे मंत्री परिषद दे मिम्बरें गी बी सगंध चकाई जाग। हाल च गै सम्पन्न होए दे जम्मू-कश्मीर विधानसभा चुनाएं, जेहड़े जे 10 बरें दे वक्फे मगरा कराए गए न, उंदे च नेशनल कांफ्रेंस 42 सीटां हासिल करिये सब्बनें शा बड्डी पार्टी दे तौर पर उभरिये सामने आई ही। स्हाड़े श्रीनगर आहले संवाददाता नै जानकारी दिती ऐ जे चुनां कोला पैहले नेशनल कांफ्रेंस कन्नै जुड़ी दी कांग्रेस जिन्नै छड़ी 6 सीटें पर जित हासिल कीती ऐ, दे अलावा इक-इक सीट जितने आहली सीपीआई (एम) ते आम आदमी पार्टी दे अलावा किश आजाद मेदवारें बी उमर अब्दुल्ला हुंदी पार्टी गी समर्थन दिता ऐ। कांग्रेस पार्टी दे राष्ट्रीय अध्यक्ष मल्लिकार्जुन खडगे, लोकसभा च विपक्ष दे नेता राहुल गांधी, प्रियंका गांधी वाडरा, के.सी वेणुगोपाल, समाजवादी पार्टी दे अखिलेश यादव ते आई.एन.डी.आई गठबंधन दे होर केईं मिम्बर नेताएं दे अज्जै दे शपथ ग्रहण समारोह च शिरकत करने दी मेद ऐ।

<><><><><><>

### Jaishankar-SCO

विदेश मंत्री डॉ. एस जयशंकर होर इस्लामाबाद च अज्ज शंघाई सहयोग संगठन एस.सी.ओ दे शासनाध्यक्षों दी परिषद दी 23मीं बैठक च हिस्सा लैडन। ओह गोआंडी मुख्य पाकिस्तान दे दो दिन दे दौरै पर कल पाकिस्तान पुज्जे हे। पाकिस्तान दी अध्यक्षता च होआ'रदी एससीओ दी इस बैठक च डॉ. जयशंकर भारत दी अगुवाई करडन। भारत एससीओ दी हर गतिविधि च सक्रियता कन्नै हिस्सा लैदा ऐ।

संगठन दी हर बरे शासनाध्यक्षे की बैठक आयोजित कीती जंदी ऐ जेदे च ब्यार ते आर्थिक एजेडे पर विचार-विमर्श कीता जंदा ऐ। जयशंकर होरे आखेआ हा जे उंदी यात्रा इक बहुपखी मकसद आस्तै ऐ। उने इस मौके पर कुसै बी चाल्ली दी दपकखी गल्लबात होने दी संभावना थवां इंकार कीता। पिछले 9 बरे च कुसै भारतीय विदेश मंत्री दी गोआंडी मुख्य दी एह पैहली उच्च स्तरीय यात्रा ऐ।

<><><><><><>

### Congress

कांग्रेस पार्टी नै कल गुलाम अहमद मीर होरे गी जम्मू-कश्मीर च विधायक दल दा लीडर नियुक्त कीता ऐ। अखिल भारतीय कांग्रेस कमेटी दे महासचिव के.सी वेणुगोपाल होरे आखेआ जे पार्टी प्रधान मल्लिकार्जुन खडगे होरे डुरु विधानसभा सीट थमां रिकार्ड मार्जन कन्नै चुनां जितने आहले गुलाम अहमद मीर होरे गी विधायक दल दा नेता नियुक्त कीता ऐ। हाल च गै जम्मू-कश्मीर दे होए दे विधानसभा चुनां च कांग्रेस नै 6 सीटें उप्पर अपनी जित हासिल कीती ते ओहदे सियासी जोड़ीदार नेशनल कांफ्रेंस नै 42 सीटें उप्पर जित हासिल कीती।

<><><><><><>

### Rashid

दिल्ली कोर्ट नै जम्मू-कश्मीर दे सांसद शेख अब्दुल्ला राशिद उर्फ इंजीनियर रशीद दी अंतरिम जमानत 28 अक्टूबर तगर बदाई दिती ऐ। अतिरिक्त सेशन जज होरे एह फैसला इंजीनियरिंग रशीद हुंदे पिता हुंदे सेहत दी स्थिति गी ध्याना च रखदे होई लैता ऐ।

जज नै 28 अक्टूबर तगर आतंकिये गी पैसा मुहैया कराने दे मामले च रशीद दे जमानत गी नियमत अर्जी गी अगड़ा पाई दितता ऐ।

<><><><><><>

### Samba-Ristristions

साम्बा दे जिला मैजिस्ट्रेट होंरें भारतीय नागरिक सुरक्षा संहिता दी धारा 163 तैहत हासल अपने इखतयारें दा इस्तेमाल करदे होई हुकम जारी कीता ऐ जे कोई बी आदमी जां आदमिं दी टोली रातीं 10 बजे कोला लेइयै बड्डे 5 बजे तगर जिले च अंतरराष्ट्रीय बन्ने कन्ने लगदे 2 किलोमीटर दे इलाके च नेई जा। जेकर कुसै गी मजबूरी च इस दौरान उत्थे जाना बी पौंदा ऐ, उनेंगी अपना कोई वैध शनाख्ती कार्ड पुच्छने पर पुलस जां बीएसएफ गी दस्सना होग। कोई बी व्यक्ति जेकर इस हुकम दी खलाफवर्जी करदा ऐ तां ओदे खलाफ सख्त कनूनी कार्रवाई कीती जाग। एह हुकम तुरत प्रभाव कन्नै लागू ऐ ते अगले 60एं दिनें तोड़ी जां जदूं तगर इसी परताई नेई लैता जंदा लागू रौहग।

<><><><><><>

### Health-Poonch

पुंछ दे जिला विकास कमिशनर विकास कुंडल होंरें कल जिला अस्पताल च लगगी दी इक बैठक च सरकार दिं सेहत सरबंधी बक्ख-बक्ख स्कीमें तैहत जारी कम्में कारवाइएं ते हासल उपलब्धिं दा जायजा लैता।

एहदे कन्नो-कन्नी उनें जिला अस्पताल दी कारकरदगी, अस्पतालै च ढांचागत सुधार, मरीजें गी दिती जा'रदियां सुविधाएं ते सेवाएं ते होनें कम्म-काजें बारै बी तफसीली जानकारी हासल कीती। डीसी होरें उनेंगी आखेआ जे ओह अपनिएं दिक्कतें-परेशानिएं, जरूरतें ते होरनें मुद्दे दे बारै च उनें दस्सन तां जे लोडै मुजब सब्बनें सुविधाएं ते सेवाएं गी हर इक सेहत संस्थान च उपलब्ध कराया जाई सकै। बैठका च आयुष्मान भारत स्कीम, जन औषधि केंद्रें, टी.बी मुक्त भारत स्कीम, जारी परियोजनाएं दे कम्म दी रफ्तार ते माली पैहलुएं पर बी चर्चा होई।

<><><><><><>

## Shah-IPS

केंद्री गृह मंत्री अमित शाह होरें आखेआ ऐ जे हून समां आई गेदा ऐ जे पुलस बवस्था देसै दे बसनीकें दे बुनियादी अधिकारें दी रक्षा लेई अग्गे औन। उनें आखेआ जे देसै दे बन्ने दे अंदर होने आले अपराधें गी जिन्ना होई सकै, घट्ट करने लेई पुलसै गी पूरी चाल्ली सौहगा ते चकन्ना रौहना लोडचदा ते हून समां आई चुके दा ऐ जे नागरिकें गी जिन्नी तौलें होई सकै, न्याय थहोऐ। गृह मंत्री होर कल नमीं दिल्ली च भारतीय पुलस सेवा दे 2023 बैच दे 76 प्रोबेशनरी अधिकारिएं कन्नै गल्लबात करा'रदे हे। गल्लबात दौरान अमित शाह होरें आखेआ जे मजूदा समें च अपराध ते अपराधि ट्रैकिंग नेटवर्क ते सिस्टम कन्नै देसै दे 99 प्रतिशत पुलस थाने, आनलाइन होई गेदे न।

शाह होंरें आखेआ जे पैहले जम्मू-कश्मीर, पूर्वोत्तर ते वामपंथ उग्रवाद प्रभावत क्षेत्र त्रै बड्डे नसूर हे, पर हून सरकार नै इनें त्रोंनें इलाकें च हिंसा गी 70 प्रतिशत कोलां मता घट्ट करणे च कामयाबी हासल करी लैती ऐ ते इनें इलाकें गी भलेआं हिंसा ते आतंक कोला मुक्त बनाने दे जत्न जारी न।

<><><><><><>

### PM-AI

प्रधानमंत्री नरेंद्र मोदी होंरें आखेआ ऐ जे मसनुई सूजझबूझ उप्पर आधारित कौशल एह 3 केंद्र टेक्नोलॉजी नमियें काड्डें ते आर्टिफिशल दे क्षेत्र च इक अगुवाह बनने दी भारत दी इक महत्वपूर्ण गैह ऐ। इक सोशल मीडिया पोस्ट च प्रधानमंत्री होंरें इस गल्ला पर अपना भरोसा जाहर कीता जे एह केंद्र राश्ट्र दी युवा शक्ति गी लाह पुजांगन ते देश दे तकनीकी क्षेत्र च विकास करंगन। एहदे शा पैहले कल केंद्री मंत्री धर्मेन्द्र प्रधान होंरें मसनुई सूजझबूझ उप्पर आधारित इनें त्रैवें केंद्रें दा अनावरण कीता हा। एह केंद्र आई.आई.टी दिल्ली, आई.आई.टी रोपड ते आई.आई.टी कानपुर च स्थापित कीते जांगन।

<><><><><><>

### JIM Rajouri

राजौरी जिले च जल जीवन मिशन तैहत पानी दी सप्लाई दियां 298 शा मतियां स्कीमां शुरू कीतियां गेइयां न ते इंदे शा 33 स्कीमें दा कम्म मुकम्मल करी लैता गेदा ऐ ते बाकी बकाया पेदियें स्कीमें दा कम्म तोड़ चाढ़ेआ जा'रदा ऐ।

एहदे बारै जानकारी कल राजौरी दे अतिरिक्त जिला विकास कमिशनर राज कुमार थापा हुंदे अध्यक्षता च राजौरी जिले च पानी दी सप्लाई दी बक्ख-बक्ख स्कीमें दी अमल आवरी दा जायजा मीटिंग च दिती गई।

<><><><><><>

### Reasi-Tobacco

जिला प्रशासन रियासी तम्बाकू मुक्त ग्रां सरबन्धी इक मुहिम तैहत इस बरे दे अखीर तगर रियासी जिले दे 2-3 ग्रां गी तम्बाकू मुक्त बनाने लेई पूरी धनधेई कन्नै कम्म करा'रदा ऐ। रियासी दे जिला मैजिस्ट्रेट विशेष महाजन होरें स्हाड़े जिला संवाददाता कन्नै गल्ल करदे हेई दस्सेया।

<><><><><><>

### India-Newzealand Test Cricket

क्रिकेट च त्रऊं मैचें दी श्रृंखला आहली टेस्ट सीरीज दा पैहला मैच अज्ज बेंगलोर दे एम. चिन्नास्वामी स्टेडियम च भारत ते न्यूजीलैंड बश्कार खेडेआ जाग। मैच बड्डलै साड्डे 9 बजे शुरू होई जाग। भारतीय टीम इसलै आई.सी.सी वर्ल्ड टेस्ट चैंपियनशिप दी अंकतालिका च शीर्ष पर ऐ ते इस श्रृंखला च जित्त कन्नै लगातार त्री बारी फाइनल च अपनी थाहर पक्की करने दी मेद होर निग्गर होई जाग।

<><><><><><>

## T-20 Cricket

आई.सी.सी टी-20 विश्वकप क्रिकेट च वेस्ट इंडीज़ नै कल रातीं दुबई च इंग्लैंड गी 6 विकेटें कन्नै हराइयै सेमीफाइनल च अपनी थाहर पक्की करी लेती ऐ। ग्रुप-बी च खेड्ढे गेदे मैच च पैहले बल्लेबाजी करदे होई वेस्ट इंडीज़ दी टीम नै इंग्लैंड दी टीम गी तय 20 ओवरें च 7 विकेटें दे नुकसान पर 141 रन गै बनान दिते। एहदे परते च वेस्ट इंडीज़ दी टीम नै 12 गेंदां बाकी रौहंदे होई लक्ष्य हासल करी लैता।

<><><><><><>